

## ■ PUNTG DA VISTA

# La paja vegn mo zacur'ina giada

DA CLAUDIA CADRUVI / ANR

**A**s'imaginai suandanta situa-ziun. Vus lavurais sco in bov. U sco ina furmicla. Vus lavurais mais ora. Forsa schizunt onns. Vossa lavur As absorbescha mintgatant uschè fitg che Vus na realisais durant gentar gnanca, sche Vus mangiais capuns u raviolis. Sch'il figl As dumonda, «Bab, tge dat 4 x 4?» lura respundais Vus, «Na sai betg, dumonda la mamma.»

**M**algrà che Vus lavurais a la Mscrivania, sentis Vus simp-toms corporals. «Pertge hai jau mal il dies, jau n'hai gea betg truschà maula», As dumandais Vus. Ma Voss'ambiziun da prestar buna lavur, e Vossa tema ch'i gjaja tut en las chautschas, è memia gronda. Perquai dola la totona, ed i fugatscha tranter las spatlas.

**T**ut quai na fiss anc gnanca uschè nausch. Il mender è che Vus obtegnais mo mintga zacuras ina giada ina paja. Sulet, sche Vus avais il cletg ch'insatgi fa stim da Vus, e quest insatgi è en la dretga posiziun ed ha la grazia da manegiar: «Bain, quest cum-pogn ha fatg buna lavur. A quel dain nus insatge.» Sulet lura obtegnais vus daners. Uschiglio betg.

**V**us pensais probabel: «Insatge uschia è nunpussaiavel. Quai è inventà e stravagà.» Igl è vair, igl è in exempel fictiv. Ma tuttina constat el. Exact uschia èsi per ils

megliers scripturs da noss pajais. Els lavuran e gudognan lur paun da mintgadi sco descrit qua sura. E sco ditg, els na gudogna betg il paun da mintga di, mabain mintga zacuras ina giada in flotta buccada charn. Il rest da l'onnu stuessan els endirar fom, sch'els na faschessan dasperas betg in job parzial, u sche la partenaria na procurass betg per l'entrada.

**L**a paja dal scriptur ha sper sia Lincalculabladad anc in auter dischavantatg. As imaginai ina giada: Vossa paja na vegness betg pajada sin Voss conto. Anzi, per che Vus vegnis tar Voss daners, stuessas Vus prender part ad ina cerimonia durant la quala la paja vegniss surdada. I pudess esser che questa cerimonia avess lieu in pèr tschient kilometers davent da voss domicil. Eventualmain stuessas Vus extra far liber in di per pudair ir a la cerimonia. Sche la cerimonia avess lieu la saira, stuessas Vus anc pernottar là.

**F**orsa duvrassas Vus schizunt ina nova garderoba, perquai che talas ceremonias èn magari pulit noblas. Durant la cerimonia vegniss spetgà che Vus teginis in pled intelligent, scharmant, critic, divertent, maisudi. Ed il davos faschessas Vus in pitschen enclin devozius per engraziar che Vus essas vegnids resguardads e betg in auter pauper galiot da Voss collegas-scripturs.

**Q**uai è la realitad dals scrip-turs da noss pajais, betg

dals hobby-scripturs, mabain da quels che scrivan a moda profes-siunala. Els obtegnan mintga ha-haias ina giada in premi, e da quel manglassan els viver. Pertge las tantiemas dals cudeschs tan-schan, sch'i va bain, gist per cumprar pampers per il pop. Per pli gronds hoppers betg.

**F**orsa schais Vus uss: «Ma in premi na pon ins betg cum-paregliar cun ina simpla paja. In premi porta reputaziun ed onur.» Teoreticamain è quai gist. Ma en la pratica n'obtegnan in autur strusch autras indemnisaziuns. E sch'ins na po betg trair vi la famiglia cun ina paja, fan ins quai halt cun premis.

**D**amaun ha lieu a Soloturn la surdada dal Premi Schiller. Scripturs da tuttas linguas svizras vegnan onurads cun premis dotads cun 5000 u 10 000 francs. Il scriptur rumantsch Leo Tuor obtegnan il premi per il cudesch «Settembri – Veta e meinis». Ils scripturs tudestgs Thomas Hürlimann e Christian Haller vegnan onurads per «Vierzig Rosen» e per la «Trilogie des Erinnerns». La scriptura da la Svizra franzosa José-Flore Tappy vegn onurada per sia ovra cumpletta. En la Svizra taliana van ils premis a Pietro De Marchi per «Replica» ed a Gilberto Isella per «Corridoio polare».

**La cerimonia cumenza a las 17.00 en il «Landhaus».**